

«Balla balla balla e sgola ent' il gol»

Ils Rumantschs survegnan in hit da ballape

■ **(anr/vi) «Hopp Schwiiz» e «Chum bring en hai» èn chanzuns da ballape per la Svizra tudestga. Uss survegnan er ils Rumantschs in hit che dechanta la balla e dat fiu als fans e giugadurs.** «Balla balla balla e sgola ent' il gol! Balla balla balla da l' Africa enfin il Pol!» è il refrain da la nova chanzun da ballape. La dumengia passada ha la melodia rebattì tras il studio Apart a Turitg. Dudesch chantadurs e chantaduras da la scena da musica rumantscha èn s'inscuntrads per registrar l'emprim song da ballape che

Benedetto Vigne ha scrit e cumponì. Tgi sa? Forsa datti perfin in hit ordlonder. Pertge il refrain – chantà cun forza da las dudesch vuschs rumantschas – sa furitga svelt en l'ureglia e senza savair co, chantinan ins gia sez «Balla balla balla e sgola ent' il gol».

Dudesch vuschs dal rock e pop rumantsch

Igl è in pau sco tar «We are the World», nua che stars mundials chantan in suenter l'auter in toc da la chanzun – mintgin

cun sia tipica vusch, saja quella uss rauca, schubra, modulada, sgriztgantada u da fim. Tenor quest muster ha *Manfred Zazzi* registrà la dumengia passada la chanzun da ballape rumantscha en ses studio a Turitg.


L'emprima strofa cumenza *Olivia Spinatsch* en stil da jazz, suenter suonda *Benedetto Vigne* – tip chantatur natiral, lura vegn *Curdin Nicolai* che tuna in pau pli discret e *Rezia Ladina Peer* giuda a la fin il tremolo sin l'ultim vocal.

En la segunda strofa èn en roda *Elmar*

Deflorin, *Roland Vögli*, *Simona Caminada* e *Riccarda Vedana*. *Elmar*, il roccadur sursilvan, dat sco adina tut tge ch'el damogna or da ses corp, *Roland* raguda en la profunditad, sco sch'el less sgrattar insatge cun sia vusch. *Simona Caminada* e *Riccarda Vedana* fan la fin – *Riccarda* cun ina presa soul. En l'ultima strofa porta *Corin Curschellas* l'emprim il ritem da jazz en la chanzun, *Olivier Pernet* cundescha cun soul, lura chanta *Susanna Sabbadini* e sco ultim sajetta *Mirco Manetsch* la balla anc cun punk-rock en il gol.

Per l'Europeada 2008

L'incumbensa da producir questa chanzun vegn dal Radio Rumantsch e da Lia Rumantscha. La chanzun duess esser pronta per l'Europeada 2008. Il turnier da ballape da las minoritads europeas cumenza ils 31 da matg en Surselva. Enturn ils diesch da matg duess la chanzun esser tagliada e finida, manegia *Benedetto Vigne*. Lura po tut tgi che vul chargiar giu il hit da la pagina d'internet dal Radio e da la Televisiun Rumantscha.



Simona Caminada e davostiers Susanna Sabbadini.



Roland Vögli vesa or uschè miaivel, ma sgara gugent cun la vusch.



Riccarda Vedana – vusch da soul rumantscha da Domat.